

Rjany spřah.

Našej wólši do rěki
 Stej so powróciłoj —:
 Z mojej starej so překi
 Wčera zapřežechmoj.

(1866.)

Hrónčka wo lubosći.

I.

Je ranko, je wječor,
 Je swětło, je ćma,
 Hdžež njej' pódla lubosć,
 Tam zbože je lža.

II.

Hdžež so lubosć zasydli,
 Twari złote hrody;
 Spěwaju tam jandželki,
 Wino njesu wody.

III.

Škrička bójska, plomjo swjate,
 Z paradiza smjertnym date,
 Lubosć, tebje jandželki
 Do swěta su přinjesli.

(1867.)

W Popojcach.

I.

Husta tam je ruta,
 Hdžež je holca kruta;
 W Popojcach je husta ruta,
 Tam je Marja kruta.